



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim tiryimyim@aolima tir yimyim TAPAK 8

BJP sorkar atsüngdoktsü atema  
opposition longjemtsüla

Nagaland nung modern wrestling  
aintsü mapang agitsü



VOL. XX NO. 127 (ADOK 127) DIMAPUR KÜPTOKNÜ (SATURDAY) TSÜKLAI (FEBRUARY) 18, 2023 ₹ 5.00

## Feb 27 Nagaland election atema nübo yimtepba manener

**Kohima, February 17, 2023 (TYO):** Nagaland nung assembly election agitsü anogo 10 dang anünga lia telok balalai nüboyimba sentong kanga meranga ayonga agidar.

Political party tem aser candidate temi vote meshia tesem balala nung nüboyimba maparen kanga meranga inyaker.

Political party 12 nung candidate 164 aser independent candidate 19-i Assembly menden 59 atema tokteper.

February 27, 2023 nü polling asütsü aser March 2, 2023 nü votes azüngtsü.

Zunheboto district kübok Akuluto constituency nung BJP candidate aser tang teinyakdak MLA Kazheto Kinimi den tetokteper shinga mali pai takok nguogo.

Election jakdang Nationalist Democratic Progressive Party (NDPP) aser BJP tsüingda menden 40:20 lemsar tokteper. NDPP aser BJP teloktemi Neiphiu Rio chief ministerial candidate ser kümsük tanaben sorkar akümtsü meranger.

BJP national lenirtem aser



CM Neiphiu Rio-i Tseminyu nung NDPP lenirtem asoshi nüboyimba sentong katsüba mapang

union minister temi Hokolbarnü Mon aser Wokha district tem nung sentong balala nung shilem agiogo. Tanü shilem agirtem rongnung Sarbananda Sonowal, Kiren Rijiju aser John Barla nung dena liasü.

Külen, NDPP lenir aser star campaigner Neiphiu Rio-i Phek aser Tseminyu district tem nung par candidate asem atema nüboyimtsü.

Taoba election nung Naga Peoples' Front (NPF)-i menden 26 nung takok ngua liasü saka taküm parnoki menden 22 nung

dang tokteper. NPF-i election jakdang tanga telok kecha dena tesentaktep yanglua mali saka NPF lenir Kuzholuzo Nienu-i election agiba sülen tanga political party aser candidate tem den yariteptsü mulunga lir ta shiogo.

Azo Nienu ya United Democratic Alliance indang co-chairman lir. UDA ya 2021 küm party ajak senteper akümba sorkar lir.

Pai NPF candidate tem aser lenirtem dang tanga political party tem anema mejembitsü metetdaksüogo.

NPF ya sorkar mashii ka nung

adentsü akok anungji NPF indang manifesto, alizüing aser teinyaktsütem indang dang jembiang ta Azo-i par party candidate aser lenirtem dang tetuyuba agütsüogo.

Congress-i 2003 tashi Nagaland nung sorkar yimsü süa aru saka assembly nung parnok MLA ka danga mali. Ajisüaka, taküm election nung parnoki candidate 23 toktepdaksür.

2015 küm Congress MLA 8-i NPF nung dena liasü aser taküm Congress-i lanurtem aser tetsür candidate shima toktepdaksür.

NDPP, BJP aser NPF teloktemi pei pei constituency

nung star campaigners anir arua sentong agir saka Congress-i media sabang balala nung sorkar anema osang agütsüyonga arudar.

Congress-i sorkar akümba nung BJP den madentsü saka kasa tangatetba aliba secular front ka nung adentsü ta shiogo.

Congress-i Hokolbarnü AICC general secretary aser MP Jairam Ramesh Dimapur-i anir arua lir. Dimapur-I menden nungi State Congress president K Therie tokteper.

Lok Janshakti Party (Ram Vilas)-i tan mezüing atema Nagaland election nung shilem agir aser parnok candidate 15 lir.

Taküm election nung National People's Party (NPP) aser Nationalist Congress Party (NCP) nungi candidate teranana (12), Republican Party of India (Athawale) nungi 9 aser Janata Dal (United) nungi 7 lir.

Tang teinyakdak NDPP aser BJP MLA tem dena ticket mangurtem teimba ka NPP, NCP, RPI(Athawale) aser JD(U) ticket tem amer tokteper.

Maneni, Rashtriya Janata Dal nungi candidate 3 aser CPI o Rising People's Party nungi kaka (1) lir.

### Special Observers den tongteprateptsü akok

**Dimapur, February 17, 2023 (TYO):** Election Commission of India (ECI)-i Nagaland General Election atema Special Observers 3 shimtsüogo.

Nagaland nung election tiptema aser ochishia agitsü atema political party tem, candidates tem aser public-i Special Observers den tongteprateptsü mesüra ken o benoktsü atema contact number

tsüinglanglen agütsür ta CEO Nagaland-i tanü metetdaksü.

- Special Observers:
1. B.R Balakrishnan, IRS (Retd.) (tRS:1983) : Special Expenditure Observer, 9366732507
  2. Ajay.V.Nayak, IAS (Retd.) - BH: 84 : Special General Observer, 98631 86669
  3. Anil Kumar Sharm4 IPS (Retd.) - PB: 84 : Special Police Observer, 9366297676

### Manipur nung B20 session agir, linük 23 shilem agir

**Imphal, February 17, 2023 (Agencies):** Manipur nung Hokolbar nungi B20 session tenzükogo. Iba sentong ya City Convention Centre, Imphal nung ayongzüker.

Iba session ya G20 summit nung shilem ka lir aser India kübok tesem balala nung ayonga agitsü. "One Earth. One Family. One Nation" omen nung ajemdaker agiba sentong nung linük 23 nungi teshimtet nübotem adener.

B20 ya global business community atema official G20 dialogue forum lir.

Tanü B20 session nung Manipur CM Biren Singh aser

union minister Som Prakash o union minister RK Ranjan Singh na aden.

Iba sentong nung agiba linüktemji Australia, Argentina, Bangladesh, Bhutan, ?had, Canada, China, France, Greece, Iceland, Japan, Nepal, Russia, Seychelles, Singapore, South Africa, Switzerland, Tunisia, Uganda, United States aser United Kingdom lir.

Manipur nung tetsür police-i dang teshimtet nübotem nem security cover agütsür aser iba ya tetsür tashi aitba sayutsü atema lir ta Manipur sorkar ketdangsur kati ashi.

### Congress-i dang Nagaland kümzüktsü aser ajungkettsü: Jairam Ramesh

**Dimapur, February 17, 2023 (TYO):** Congress-i dang Nagaland kümzüktsü aser ajungkettsü ta Rajya Sabha MP aser Congress general secretary incharge-Communications department, Jairam Ramesh-i ashi.

Congress-i Nagaland nem state agütsü aser Arrla 371 (A) benok anungji Congress-

i dang Nagaland kümzüktsü aser yimjung, teputep aser terenlok leni anitsü, ta Jairam Ramesh-isa ashi.

Tanga party ajak ya BJP indang kongsangtem ama kümogo, ta paisa shisem.

Civil society temi Nagaland nung election tiptema aser ochishia agitsü atema mapa inyakra Congress-ia iba nung

nungittsü, ta Ramesh-isa metetdaksü.

Hokolbarnü osangbener den senden amendang NPCC president K Therie-i Congress indang 'Seven Guarantees' sayatsü aser Congress nem sorkar akümtsü maongka agütsüra item guarantees inyaksü ta pai nangzük.

### BJP-i "Hallelujah!" "Praise the Lord" ayimba aitsür: DAABAPF

**Dimapur, February 17, 2023 (TYO):** "Haliluya" ta asüba ya Khristantemi onok Taküm Tsüngrem nem tenüngsang agütsüba lir anungji iba ya election nung amshitsü makok ta Dimapur Area Ao Baptist Pastors Fellowship (DAABAPF)-i metetdaksüogo.

BJP candidate ka, BJP züngsemtem aser parnok pusemertemi iba olen amshiba khukhua aitsür ta DAABAPF-i sangdong ka nung ashi.

BJP candidate ka, ketdangpurtem aser

tangartemi election sentong ka nung "Hallelujah! Praise the Lord!" ta ayimtenba video ka Hokolbarnü kanga prokshio.

"Tawa BJP pusemer kari 'I have decided' ken tensaba ajanga Khristantem temulung yirutsür lia ano BJP ketdangpurtem aser pusemertemi election nüboyimba sentong nung 'Hallelujah! Praise the Lord!' ta ayimtenba ajanga temulung tali yirutsüogo" ta DAABAPF President Temsu Jamir aser Secretary Mar Longkumer nati sangdong ka nung ashi.

"Dimapur Area Ao Baptist Pastor temi nenoki mashimemetetba tuteta sayur aser nenok dang tangatetba mashilen agi iba temeshi olen mamshitsü metetdaksür. Ozü Taküm Tsüngrem nem tenüngsang agütsüba olen ya nenoki yimtenren alizüing atongtsü mechi nung mamshitsüla" ta DAABAPF ketdangpurtemisa ashi.

"BJP candidate tem aser BJP züngsemtemi tamangba yimsü indang ken aser olentem amshia public manisatsü metetdaksür" ta DAABAPF-isa metetdaksü.

"Sen agi Vote alir lenir akümtsü merangba jagi na lenir asütsü metemsü ta jangjatsür" Anonymous

- Ungma Baptist Arogo Laishir Telongjem Clean Election Tayongzükba

## Governor Prof. Jagdish Mukhi den tepila sentong agi



Nagaland Governor menden yutsüsang Prof. Jagdish Mukhi, pa kinungtsü First Lady, Prem Mukhi, Nagaland indang taoba chief minister S. C. Jamir, Chief Secretary J. Alam, IAS, sorkar ketdangsür aser tongtipang nisungtem Imkongliba Ao Hall, Raj Bhavan, Kohima nung February 17, 2023 nü tangokba noksa nung angur.

**Dimapur, Tsüklai/February 17 (TYO):** Nagaland indang Governor menden nungi alusang Prof. Jagdish Mukhi den tepila sentong ka Dr. Imkongliba Ao Hall, Raj Bhavan nung February 17, 2023 nü agia liasü. Iba sentong nung First Lady Prem Mukhi, Nagaland indang taoba chief minister S. C. Jamir, Chief Secretary J. Alam, IAS, sorkar ketdangsür, Raj Bhavan nung ketdangsür aser staff tem aser tongtipang nisungtem dena liasü.

Governor, Prof. Jagdish Mukhi ya Nagaland indang Governor ka ama September 17, 2021 nung shima liasü aser pa state nung alidang nüburtemi akumtsüboa amshiba, temeim sayuba aser yaritepba atema pelaba lemsatep.

Pai Nagaland indang Governor tasenba La Ganesan den salema pa dak tamang katetba ashi aser pai linük aser Naga nung aser ajungtsü asoshi meja-meja, tashi ita aser yimya shidak amshia len anitsü, ta ashi.

Pai Raj Bhavan ketdangsür aser staff tem nem tenüngsang agütsü aser parnoki amalitep makaibo kecha nunga takok mongutetla, ta ashi.

Nagaland indang Governor inyaktü mapa talila agizükba bilemteta jembidang, pai mapa tuluka agizüker, kong nendaka inyaktü aser institutional capital

wazüka ayutsü nungdak ta angateta liasü, ta Prof. Mukhi-i ashi.

Pai state tesem ajunga sema jajadang nüburtem den ajurutepa sensaksem akaba ajanga pa ajungmeso aser tashi itdaksü aser lokti ajunga nungi pa nem temoatsü agütsü aser yaritepa liasü, ta ashi.

Ochimashi maparen ya terenlok aser junga yimsütsü asoshi tsükchir ka lir, anungji sorkar aser nüburtem lungjemer linük nükjidong nung takok angutsüla, ta pai ayongzük.

Paisa legislator, heads of departments aser staff ajunga dang pelaba lemsatepa liasü.

Commissioner, Nagaland, T. Mhabemo Yanthan, IAS ajanga iba tepila sentong nung jembidang, Commissioner & Secretary to the Governor ka ama alidang Governor Mukhi den külemi inyakshiba ya maongka tulu liasü, ta ashi.

Prof. Jagdish Mukhi-i state tesem ajungalen sema jajaogo, nüburtem ajurua sensaksema liasü, ta pai ashi.

Pai international border anüker aser nüburtem ajungmeso, ta ashi.

Aluyimba, tetsür temeden, lanur entrepreneurship aser tesendaktep tsütsü pei sasa pei peria alitsü angdonger ka ama Prof. Mukhi liasü, ta Yanthan-i ashi.

Temelaba makai ozüngi memelaba check gate tem pa office mapa agizükli tasü ita shibangtsüba atema tenüngsang agütsü aser iba yongji state nung shishilempar khuret ajema kumdaksü, ta Mhabemo-i tenüng sanga liasü.

State sorkar tenüng nung jembidang, Governor ka ama küm ka-ser tesadang inyakba ya tereprangtsübo tilaka lir, saka pai lenla ajunga nung temelenshi jenti bener arutsü, ta Chief Secretary, J. Alam, IAS ajanga ashi.

Pa indang shisatsü, ajangshia aliba aser senotsü tsütsü pa shisatsü ya state tashi aitba tsütsü len sayur ka ama liasü, ta ashi.

Dimapur aser Kohima tsüngta 4 lane lenmang yangluba amala project tem tekeraba nung inyakdaksüba asoshi Chief Secretary-i Governor nem tenüngsang agütsü aser pai temolung agüja mitba yong tajangzük jenti nguogo, ta ashi.

Sentong temer pa Assam-i aotsü lia Assam Rifles Helipad, Kohima nung Nagaland Police ajanga rashtriya salute agüja liasü.

Anepdang Nagaland Chief Minister Nephru Rio aser pa kinungtsü nati Governor Prof. Jagdish Mukhi aser pa kinuntsü ajurua liasü.

## Kohima district atema training round tanabuba agir

**Dimapur, Tsüklai/February 17 (TYO):** Nagaland Legislative Assembly 2023 atema aruya aliba General Election asoshi shima aliba Polling Personnel/Grade-IV staff tem atema round tanabuba training anogo ana-nü agütsü tenzükogo. Iba training ya Kohima College, Kohima nung February 17 - 18, 2023 anogo agütsür.

February 17, 2023 nü training ya 8 Western Angami A/C, 10 Northern Angami-I A/C, aser 11 Northern Angami-II A/C atema agi. Iba training ya Election General Observer,

Janak Prasad Pathak-i semdanga liasü aser pa meina Deputy Commissioner & District Election Officer, Kohima, Shanavas C aser ADC & RO Kohima, Rhosietho Ngouri den danga ketdangsürtem arua liasü.

9 Kohima Town A/C, 14 Southern Angami-I A/C, aser 15 Southern Angami-II A/C atema shima aliba Polling Personnel/Grade-IV Staff tem asoshi training ya February 18, 2023 anepdang 10:00 ako nungi tenzükaga Kohima College, Kohima, Billy Graham Road nung agitsü.



MGHSS, Mokochung nung February 17, 2023 nü Polling personnel/Election ketdangsürtem nem training asemen buba agütsüdang General Observers, Prashant Kumar Panda, IAS aser Kamal Kant Saroch, IAS nati jembiba noksa nung angur.

## ADC Tuli ajanga party aser candidate tem dang metetdaksür

**Dimapur, Tsüklai/February 17 (TYO):** Election maparen tajungtiba nung tetsükdaksü makai agitetsü asoshi vehicles

campaigns, rallies, processions, meetings, loudspeakers amshitsü aser election offices/camps amenoktsü atema candidate aser political party

temiemelaba meshitsüla, ta ADC Tuli ajanga nenshia metetdaksü.

Jelia temelaba makai election dak sendakba maparen inyakba mesüra tiazü osang agütsüba atema tapet ozüng kübok temerenshi alitsü, ta ADC Tuli ajangasa ashi.

## Election ya democracy benjong ka lir : DC Bhanudas Mali IAS



**Dimapur, Tsüklai/February 17 (TYO):** Clean election dak sendakba nung Systematic Voters Education and Electoral Participation (SVEEP) indang seminar ka February 16, 2023 nü Multipurpose Cultural Hall, Zunheboto nung ayongzükaga liasü.

Miss Sumi 2022 indang 1st Runner-up, Linovi Kiba, shiba SVEEP icon Zunheboto lir, lai nüburtem dang tarutsü anogotem jungdaksütsü asoshi lenir shidak shimtsü tashi lir, ta ashi.

"Nüburtem aintsü asoshi election nung shilem agitsü

kanga tongtipang lir aser asenoki yangji tajungtiba nung shilem agira, asen lokti nung asendenshi arutsü aser tarutsü jenjang yanglutetsü," ta lai ashi.

Constitution ajanga tongtipangtiba tashi nüburtem nem agüja lir aser ibaji vote agütsütsü temeden ya lir.

Universal Adult Franchise kübok arishi küm 18 aser tema senso ajaki vote agütsütsü temenden agüja lir, anungji ajaki clean election maparen inyaktü ajungshir, ta lai ashi.

Iba sentong nung Deputy Commissioner aser DEO Zunheboto, Bhanudas Mali, IAS ajanga ashiba agi, election ya democracy benjong ka lir aser nüburtemi iba election ya yimjung nung benjongtsüla.

Lokti tentet balala aser yimtsüng temi election temürek aser timi agitsü nangzükba atema pelar aser ano administration aser Election Commission of India nem teyari agütsüba asoshia pelar, ta pai ashi.

Election agiba anogo jurila gari tem administration nungi temelaba makai tesem ka nungi tesem kati oli-oratsü

memelatsü. Proxy voting, double voting aser election inyakyim nung timtem agütsüba nungi kumzükaga ayutsü mechi iba mera ya agitsü, ta pai nüburtem dang tekumdangtsü ashi.

Tanü tashi election dak sendakba nung rongrongshirong mesüra azüdokshi maliba atema pai Zunheboto nung aliba nüburtem dang pelaba lemsatepa liasü.

Iba sentong nung Bisalee, Assistant Election Officer ajanga melepzüng o jembiba aser sülen Rev. Inakhu Sumi-i sarasadem aser AEO Zunheboto ajanga EVM amshiba yimya sayua liasü.

Iba sentong nung menden Yentinoungbou, EAC V.K liasü aser sentong tenzükaga Aboli Aye, Asso. Pastor SBCZ ajanga sarasadem.



February 17, 2023 nü Bengaluru nung aliba Yelehanka Air Base nung Aero India 2023 sentong tatembangbuba nung Indian Air Force (IAF) indang Sarang aerobatics team-i shilem agiba noksa nung angur.

### LG-i shimba züngsemtemi Mayor election nung vote agütsütsü makok: SC

**New Delhi, February 17 (Agencies):** Delhi Lieutenant Governor (LG)-i shimba Delhi civic body nung züngsemtemi mayor election nung vote agütsütsü makok, ta Hokolbarnü Supreme Court-i obendang agütsüogo.

SC obendang ajanga Delhi nung mayor shimba tsütsü Aam Aadmi Party aser BJP tsüingda mangatettep adoka aliba tembangtsü.

Tesüiba ita ana tsüingda mayor election asemben tashi thinenogo. AAP-i, BJP-i mayor menden atema BJP lenir ka shimtsü asoshi civic body amokbangtsü meranger, ta aitsür.

Yaküm December ita nung Municipal Corporation of Delhi (MCD) election nung AAP-i BJP dang nungi menden teimba nung takok ngua liasü. Taoba election nung LG, VK Saxena-i council züngsemtemi vote agütsütsü merangba anema AAP-i longkak aita mangatettep tulu adoka liasü.

Hokolbarnü Supreme Court-i, mayor shimba sülen ang deputy mayor shimtsü akok, ta metetdaksü.

"Kodang mayor shimdir pai maneni election agütsü atema senden ayongzüka agütsü. Mayor election mezüing agütsüla; iba sülen ang deputy

shimtsü atema mayor leniba nung senden ayongzüka amentsü," ta Chief Justice of India, DY Chandrachud-i metetdaksü.

SC-i obendang agütsüba sülen AAP tongti lenir aser Delhi Chief Minister, Arvind Kejriwal-i twitter ajanga, "Supreme Court obendang ya democracy atema takok lir. Supreme Court dang kanga pelar. Ita ana ser tesadang sülen Delhi nung mayor ka angütsü. SC obendangji ajanga Lieutenant Governor aser BJP nati linük temzüng alema tetuyubatem agütsüba kuli sayuogo," ta metetdaksü.

### BJP sorkar atsüngdoktsü atema opposition longjemtsüla: Shashi Tharoor

**New Delhi, February 17 (Agencies):** Kerala Congress MP, Shashi Tharoor-i, taruba Lok Sabha election nung opposition-i constituency shia nungi candidate kaka dang toktepdaksüra Narendra Modi-i aniba BJP-i timtem ajangshitsü, ta metetdaksü.

Congress lenirisa, "Taruba general elections ya jangratemtsüka asütsü. 2024 küm opposition-i kecha mesütetsü, ta jembirtem den ni ai-aura makar," ta ashi.

Osangbener den jembidang Tharoor-i, BJP-i 2019 küm election nung melamela takok anguba ama taruba election nungbo mangütsü, ta ashi.

Opposition teloktep nung tongtiji Congress asütsüla asü? ta asüngdangba langzüdang taoba mapang Union minister Tharoor-i, "Atangji BJP dak alia linük tesem ajaklen aliba party ji iba party (Congress) ya lir aser BJP tashi meiti aliba India tesem kar nungbo onok kanga tashi itta lir. Tatishtsü agi, ozü state (Kerala) aser Tamil Nadu lir," ta metetdaksü.

"Linük nung Congress tsüingnep lir, puti otsü lir aser onok tesem ajaklen lir, anungji Opposition front mesüra tarütsü nung Opposition sorkar nungji iba party tongti asütsüla," ta pai ashi.

BJP sorkar atsüngdoktsü atema Opposition telongjem nüngdak, ta shia Tharoor-i, "Election jakdang teloktep yanglutsü akok mesüra BJP candidate anema opposition nungi tashi taittiba candidate kaka dang shimtsüla," ta ashi.

"Opposition-i constituency shia nung candidate kaka dang shima toktepdaksüra 2024 küm BJP-i timtem ajurutsü," ta pai ashi.

Congress Tir elections agiba aser Bharat Jodo Yatra sentong agiba ajanga party asentenshidaksür asü, ta asüngdangba langzüdang pai, "Ni yamaji bilemer. Congress Tir election agiba sülen taoba mapang Congress tir, Sonia Gandhi-i kü dang, iba elections ajanga party tashi itshidaksüogo, ta shiogo. Bharat Jodo Yatra agiba mapang nüburtemi junga agizükba onoki reprangtetogo, talisa Kashmir nung iba sentong tembangba mapang nung aikati junga agizüka liasü," ta ashi.

"Iba (yatra) ya ajanga Rahul Gandhi tenüing tuogo, aser ibaji ajanga Congress party-a jenjang ajunger. Iba ya ajanga Congress nung inyakertem ajungmesoogo, anungji tarütsü nung tayongzüka balala ajangshidang party asüingsashitsü," ta paisa shisem.



### Taküm atema Chiyongtsü Tajung

### Temo, Shini aser Metsü kanga aliba tachi tajemtsütem ajema Chiajemang.

Nsung aikati Temo, Shini aser Metsü kanga aliba amtsük aser tajemtsü achir aser ajemer. Item chiyongtsü chiajemtsü atema kecha shia mali kechiyong temang anema alitsü artema parnokji menüngdaker.

#### Chiyongtsü Aliba Temetetsü



Item chiyongtsütem nung ya temang atema tajung tera dang lir aser item achiba agi temang kanga ulua akümtsü aser iba jagi temulungjang tashidak, type 2 shini tashidak aser cancers amala adoktsü.



Terenemba balaka nung yangluba chiyongtsü aika cakes, biscuits aser nanglong amala nung shini kanga enoka alir aser iba jagi nüngdak maliba tashi talila agütsütsü.



Metsü kanga tali achiba agi blood pressure talila tudaktsütsü, iba jagi na temulungjang tashidak aser stroke atongtsüba asemben agi talila akümtsü.



Terenemba balaka nung yangluba chiyongtsü aika terenem bener aotsüsa angubatem nung temo kanga lir aser item jagi temulungjang nung timtem agütsütsüa akok.

#### Chiyongtsü Tajung Achiyim



Temo, shini aser metsü aliba tachi tajemtsü anogo shiabo machi majemtsüla. Tilala mesüra pelateptsü atema tatazük ka dang chia jemang.



Akok tashi chips aser renemer akaba chiyongtsü tali techi, item nungji temo, metsü aser calories tali lir.



Chiyongtsü tajung süngjanglijang aser süngolembatem dang chiang



Shini aketba tajemtsü masü tzü jemang

Temang nung tashidak adokbaji talisa chiyongtsü tamajung achiba ajanga lir.

Issued in Public Interest by State Food Safety Authority, Department of Health and Family Welfare, Govt. of Nagaland.

### 'Hindu Rashtra' ya Mahatma Gandhi tangatetba anema lir: Nitish Kumar

**Patna, Tsüklai/February 17 (Agencies):** Hokolbarnü Bihar chief minister, Nitish Kumar-i, Sangh Parivar-i India ya "Hindu" linük, ta jembiba ya Mahatma Gandhi indang tangatetbatem anema lir, ta metetdaksü.

JDU lenir Nitish Kumar-i yaküm BJP den teloktep raksaa liasü.

Tan hopta tetenzüklen Uttar Pradesh Chief Minister, Yogi Adityanath-i yimjak nung "Hindu rashtra" indang jembiba dak sendakba nung osangbenertemi asüngdangba langzüdang Kumar-i,

"Babu (Mahatma Gandhi) indang tangatetbatem anema jembibaji asenoki kecha mangatsüla. Iba linük nung tamangba yimsü balala amanger ajak külemi alir. Babu-i telongjem atema nokdaka liasü, ibayongji pa tepset," ta ashi.

Mahtama Gandhi-i secularism atema nokdak, anungji asenoki ibaji anema inyakra ibaji ajanga teraksa lenmangi anitsüa akok, ta Kumar-i ashi.

1974 küm Bihar movement nung shilem agisang, Nitish Kumar-i 1990s nung BJP den loktep aser Atal Bihari

Vajpayee-i aniba sorkar nung Kumar-i tongtibang portfolio aika ngua liasü.

Bihar nung CM mapang talangtiba inyaksang, Kumar-i mezüing 2005 küm CM inyaka liasü aser pai BJP den teloktep yangluaka BJP indang "Hindutva" tangatetba nung ai-aura makai liasü.

Taoba mapang Gujarat Chief Minister, Narendra Modi-i Bihar nung election atema nüboyimtsüsa akümba aser BJP-i Modi Chief Minister candidate aginüba nung ajemdaker Kumar-i BJP den teloktep raksaa liasü.

2017 küm maneni Kumar-i BJP den loktep, ajisüaka küm pongu dang lirbo ano iba teloktep raksaa liasü.

RJD MLA aser taoba mapang minister, Sudhaker Singh-i, Bihar nung sorkar yagi aluyimertem anema inyaker, ta aitsüba dak sendakba nung Kumar-i, "Onoki koba tashika aluyimertem atema inyaker aser aluyimba sector koba tashika renlokar item nisungtem yagi memetet," ta ashi.

Singh ya agriculture minister inyaka liasü saka pa iba menden nungi anentsüba sülen nungi pai mapang shia state nung JD(U)-RJD teloktep sorkar aija arur.



## TIR YIMYIM YIMOBILEM (EDITORIAL)

DIMAPUR

KÜPTOKNÜ,

TSÜKLAI 18, 2023

### Ruling nung linürtem

**E**lection mapang, tang amai yimten telok balalai nübortem rongnung nüboyima jajaba mapang election-i aiertem aser yimten lenirtemi aiben nübortem dang 'Ruling government nung denüra, onok den denang' ta ashiba angashir. Iba oji tanganütsüka aser tepuatsüka, idakji takoksatsüsa kecha mali saka teimla tajung agi sünga lir. Ajisüaka, ibaji kodang jungjunga bilemdangdir, asenok tanishir asütsü melen tanidaker akümbaji yimten tangatetba nung masü saka 'ruling' nung denüba ajanga lir ta angatetsü. Asenoki aiben yimten nung telongsu apia adener, anungji asenok aden - maden pi memeteter. Kasaji, election mapang nisung aikati repranga lir, tesülen takok angutsüla asübalen oa adener, anungji tadenbo takok angulen aden saka tangari mezüngshir, anungji tajung kecha agia matar. Asenok dak aketba item jaklatemji kodang bilemdangdir, atangji, asen agi asen nümamedangtet, taküm piyong takoklen apia tangar sülen, tangar sülen dang anidaksü na (?) ta asensasa asen dang asüngdanghgsüsa adoker. Yimten nung senso ka mapaji takoklen apia adenbaji masü saka tamakok ngur alidak tashi itshidakja takok ngudaksübaji lir, süra idakji asenok lenir akümtsü. Aji oda, senso ka mapaji telongsu apia telok tuluba aser teimba alidak oa adenbaji masü saka melongsudak, azüngazünga alidak, ishika agi aika kümdakja takok ngudaksübaji lir. Tanü asenoki asenoksasa tekolak agi teben kümogo ta jembibaji, tanga agi masü saka tangari ishika agi aika kümdaksür longsulonghua oa alidak dena jajaba ajanga lir. Atangji, ishikati aika akümtsübaji aser azüngazünga aliba yimten telok ka longsulonghua kümdaksütsübaji temela masü, aji ayongayonga mena lia ataloktsüba mapa ka masü, yangji tatala, nüngsen, nübo aser rongsen tenla aika dena lir. Item timtem ajakji kokteta inyak nung dang ishika agi aika kuma election nunga takok angur aser ruling telok akümer. Atangji, yimten nungbo ishika - aika ta masü yimten telok nükjidong aser pei tangatetba kaka lir, anungji 'ruling' mesüra 'opposition' ta masü saka pei yimten nükjidong aser tangatetba nung nokdakra, election mapang pei vote kecha agia shingiaia alizüktsü makoktsü aser ruling agia mepuatetsü aser opposition agia maoksatsütetsü. Tatishitsü agi, yimten telok kati asenok sobaliba anema nokdaker aser iba telok jagiang government akümtsü amai repranger, anungji asenokbo ruling nung adentsü mechi iba telokji yaritsü asü ? Mesüra opposition nung alitsü asüyonga asen sobaliba anema telok denbo kenyongi madentsü ? Ruling nung adentsü kija bilema senzürtem ya pei kidang aon tajung soa maka ser tangar aon tajung soa akaba ki bushia chiyongtsü senzür amai lir. Tangar jagi jaketa chiyongdaksütsüa akok saka iba kidangji asen kiburbo mesütetsü. Ibaji mesüka tanü asenok tangar lungsudak adenba agi kibur mekümtetter. Aji oda, tangar tanishir ser takok nguyonga oa alidak asenok oa aden nung asenok yangji kechi shilem agi atatsü ? Kasaji, tangar timtatemtsü tashi tema inyaker külen, asenok tatemtsü anasa oagi aden nung asenok shilema kechi asütsü ? Asenok ama kin aser asenok ama nisungbo, ruling asütsüba government arishia masü saka asenokiang opposition asütsüba agi ruling kuma inyaktetsüla. Kasaji, asenok ama samanirtemibo pi aika adenshia alidak oagi atsüoktsübaji masü saka teimla makaba pur nisung ishika adenshia alidak oa aika kümdakja yimten yimli mesotsüla. Aji oda, asenokbo tangar takok ngua akadak oagi tamalenpurtem den tagitsü rakteptsübaji masü saka asenoki ajangzüksetba temoatsü aser tagitsütemang tangar den lemsateptetba purtem asütsüla. Ruling nung dennüba nisung aser telok asübo tanü India nung BJP telok ya mali, alemli Congress wangshidang to samar lila. Kasaji ruling nung dennüba nisung aser telok asübo kum ter tsüngda India nung Congress telok ya mali kümer lila. Asenoka parnok nungi lesson angazükdi aser yimten nungbo telongsu aser takok apia masü saka pei nükjidong aser tangatetba nung pei kija asüyonga takoksa aser timtem arema nokdakba yimsüsür aser nübor asütsü merangdi.

## OLEMSABANG

### Tejembir Masü, Teinyaker Kümang

Mrs. R.Mapukala, Pongen, Merangmen Tzürangkong

Küm pezü renteter pongububa mezüng election mongpo. Candidate-temi Nagalima kinük pezü nungi tanganütsü yimyim, Metsü ozü ola ama akümlirtemi angashir. Mosai sina tenem nungi kanan li yongyaseta penzü medem, Posü ozüi mesang süng tejang atang yongya ama ata nung, Temelenshi kichia mangur meimchirtemi. Lemang tajung yanglutsütsü...Naga lima nung mangura to!

Shisa liok tajungba melenshitsütsü...Tesayura tajemba dang, Mozü ki tajung lapoktsütsü...Nashi ki den sako. Zünger mapa mongui alir lanurtem mapa agütsütsü. Sensaker chirnurbo tazüngba shidak liaka mapa mangur. Minister, MLA chirnur, anükapang tashi Government mapa, Takar ,tultur chirnurtem-ang office asüng. Sensaker, ochishirtem koloni aotsü ? Nübortem asüktemer ani.

Election aongmedangbo jungrara...meshisadangi jembir masü na, Ni atokra gate shibanga mayutsü...takar, sensaker ajak "WELCOME" Saka kum pongo nung nübori nü tejak mangu. Na vote aginü dangbo MEEM Sahib nünaprongla menürem jakden. Atokerbo tilar, sensaker dakbo meranglok, ya kichi yimya !! Na ajurutsü dang nungibo Yisu ajurutsüang temelaba aküm. Vote aginü dangbo "SAN OLA" Tultur kümerbo molusongzü.

Takar, tultur den sensaker leni maor ajak temeyongbo kesa dang. Saab-bai lajartembo mangur, yimti tulu nung yimsüsürbo metet. Saka yimtsüng tila nung yimsüsürbo memetet. Development ajak takar, tultur asoshi dang. Naibo mangashira na !! Timtemertem anüngba olaji. Hai!! Party workers tem, na yangko asüngtsü temerang. Tultur o nübor na tsüngda na lensanir süang ma.

Tamaren lenir tajungtem, Declaration mapang o tajung aika tejembi. Na vote aginü dang meinyaktetsü o aika tenangzük tongmelang süang. Yimlibilema nübori kü nem nü ochi meyongnem agüjang ta shiang. Teyazü tenangzükbatem mapang intoka nübor temesüzük. Lakogo..Teyazü ola osü, teyazü lenirbo jogo maginüra. Ina !! Tsüngremi shimtetra, takoker rongnung tenra, Naga lima asoshi lokti ajak ajungtsü terenlok mapa inyaka sayuang. Süra nai ojang ishika dang jembiaka nübori na tushitsü.

Hai NAGA nunger! Tenok tenoka angangni... Declaration mapang candidate kangabo tesang, anemsü o tejembi. Sarasademjang, rongsen akaribo mapayui tenla-ang, sen temeshi. Karibo kum pongo nung kichia meinyaktsü sür nung, Pasa tajungba mapa tajung aika inyaktsüogo ta teshi. Ochiba nungbo asangtsü tim, saka jakdaka teyazübo tepura. Tajung inyaktatem yimjak nung shiang, masüba nung kanga tesangtep. "Küm 5 sülen aseni shimtetba lenirji asangtsü asü masangtsü, ata-a lidi."

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Pastor kati Yisui inyakba ama anogo 40 lumitsü merandang süadok



Pastor, Francisco Barajah

**February 17, 2023:** Mozambique linük nung pastor kati Yisui Khristai anogo 40 nü tashi lisem lima nung lumiba ama anogo 40 nü lumitsü merandang süadokogo.

Santa Trindade Evangelical Church tenzüksang pastor, Francisco Barajah-i Laishiba nung shia alima ama Yisui mesüka anogo 40 nü lumia sarasademtsü merang, ajisüaka pa Beira yimti nung aliba hospital ka nung süadokogo.

Arrshi küm 39 pastor jagi anogo 25 tashi chiyungtsü machiba dang masü tzü-a mejemi lumia aru saka par kinüngertemi mepishiba nung

ajemdaker pa hospital-i anir ao. Pa dak acute anaemia putet aser pa temang shilem kari mapa meinyaki aküm; ajioda doctor temi pastor nem serums agütsüba den külemi chiyungtsü tanük agütsü, saka pa meküzmükteti Bodhbarnü (February 15) süogo.

Santa Trindade Arogo nung züngsemtemi ashiba agi, pastor Barajah ya French tesayur-a inyaka liasü aser pai mapang shia lumia sarasadema aruogo, ajisüaka pai anogo aika lumiba yabo tang mezüing liasü.

Osangtajung kaket Mathi nung Yisui Khristai lisem lima nung anogo 40 nü tashi lumiba

indang shia lir; tamalena nisung aikati Yisui lumiba ana anogo 40 tashi lumitsü merang saka mekoki liasü.

2021 küm nunga nisung kati anogo 40 tashi lumiba ajanga Tsüngremi pa nem gari tajung ka (Lamborghini) agütsütsü, ta shia lumia liasü.

Zimbabwe nung aliba Arogo ka nung lanur lenir arrshi küm 27 tebursang jagi shingaia mangudak tenem ka Yisui lumiba ama lumitsü meranga liasü. Anogo 33 buba nung nisung kari pa ngua Bindura General Hospital-i anir aoba ajanga dang pa kümzüka liasü.

## ANOGO ABEN TSÜNGREM DEN

### Sannüker Den Taküm

Kibuba kü sannüker; ni kechiaia manüngtsü; Pai ni rem lanu rongnung mejangdaksür; Pai ni tzü tasüngtet anasai anir."- T.Ken 23:1-2

San ka ama aliba nung mamangtetba tesünep temulungjang nung kadaksür. Laishibaren sannükeri Pa santem nüngdak ajak metetter. Pai parnok chiyongtsü koba tajungtiba aser koba parnok den mapet, pai metet. Kodang parnok chiyongtsüla aser kodang tzü ajemtsüla Pai metet.

Sannükeri longren aliba metet aser chiyongtsü aser tzü tajung alidak metet. Sani sannüker dak temulung lema aser anidaka ali tashi, parnok nüngdaktem mapang shidak nung angutsü. Parnok sannükeri pa akaba tajungtiba parnok nem agütsütsü.

Nai Sannüker Tajung dak bendanga amanger asü? Alima nungi anguba chiyongtsü dang nungi Pa nungi anguba chiyong tali züngshir asü?

Tsüngremi ne nüngdak karbo na nungi sottatoktsü ta arendaker asü? Ken züluri pa "kechiaia manüngtsü" ta amang. Sannüker tajungi Pa santem anepalur aser parnok asoshi Pa taküm agütsür (Yn.10:11).

Nai ne nükrang sannüker nungi Sannükeri agütsüba tsütsü meyiper asü? Na langka kati anünga lira, ibaji Sannüker ne nüngdak mabensadaksünüba agi masü. Na tamang nung anünga aliba agi Pai agütsüba ajakbo nai magizükteter asütsü akok. Sannükeri agütsüba nung nai temulung masür asütsü akok. Sannüker shibai na anebalur Pa nungi aruba tepela nai magizükteti ali asü? Pa dangi meyipang aser Pai dang agütsütetba ne nüngdaktem angutsü Pa dak amangang.

## LATTER RAIN REVIVAL TELOKI SARASADEM AYONGER

**Anogo:- 19th February 2023 Mapang : 5:00 am to 6:00 pm.**

Clean Election katettsü atema asenoki joko küm aika jembia aser ayimtena aruogo, aser shirnoki iba asoshi mapang, shisatsü, rongsen aser nübo aguja inyaka arudagi parnok dang pelar aser Tsüngrem tenüing asanger. Clean Election ji clean voters, clean candidates aser clean party ta asenoki angatetdi.

Tanü asen lima asoshi yimjung aser terenlok nüngdaker. Terenlok liaka yimjung melira terenlokji tajanzuk ka-a mamshiteter. Yimjung liaka terenlok melira tejakleni maor. Election nung asenoki shirnok shimdir, parnok jagi rongsenketzüng aser terenlok ketdangsüba mapa tulu inyaker. Anungji parnokji nübur miemba aser Tsüngrem tsüsubatem asütsüla. Esau-i chiyungtsü auso ka yong pei senmang yokdok ama nüburtem masütsü sarasademdi, ano shirnok shimtetdir parnokji Daniel medemertemi tasü itta Tsüngrem asoshi nokdakba ama nokdaksüpur shimtetang ta sarasademdi.

Tamangba asoshi tongtibangsa Khristantem reshikangshiba küm 10 tsungda India nung kanga renloka odaki. Linuk temzüngi (constitution) mela-a aguja aliba ama tamangba nung kecha tenokdangba aser reshikangshi makai litettsüsa tasü itta ola adokba tang tashi nung Naga nunger Khristan yimsüsürtem rongnung mangur.

Memeteti asen lima alar tiai maitsü kanga sarasademdi. Laishibai ashir, "Meimchir yimli madak Tematibai yimsü asür, aser aji Pai molunger nem agütsür." Daniel 4:25. Tsüngrem metsübur, nübur memeimer aser tamajung asoshi ola madokertem asenok asoshi lenir Tsüngremi memelatsü sarasademdi.

### SARASADEM ONÜKTEM

1. NBCC-i anir mongdangtem aser Arogotem dangi Tsüngremer taochi ola maneni yokang ta sarasademdi.
2. Tang Turkey aser Syria nung menenok lendong nung timtemertem asoshi sarasademdi.
3. Asen lima nunga item amala lendongtem mataloktsü sarasademdi.
4. Khrista yimsü tsükchir tulutibai asen lima koda amokbanga arudagi, ya khenyongi amongtokjang ta sarasademdi.
5. Asen tamangertem sarasadem ola kanga ajema kümogo, anungji asentenshijang ta sarasademdi.
6. Asen India lima nunga Tsüngrem mapa inyaksü kanga mesademi küma odar, anungji iba atema kanga sarasademdi.
7. Election mapa agi asen lima kanga menena kümogo, anungji kümzüksü Tsüngrem nungi taochi meshia sarasademdi.
8. Rongsen yong masü saka ochiba agi lenir tajung shimtsü nüburtem molungjang nung jembiang ta sarasademdi.
9. Asen lima Election mapang azü tokshiba aser iba amala mapa tamajung mataloktsü sarasademdi.

### TEMETETTSÜ:

- i. Sarasadem mapang agüja aliba nungji nai molungba mapang ka nung ghonda ka (one hour) agiteta agitsü akok.
- ii. Agüja aliba sarasadem onüktem den ano naia inoksema agi nunga tajungba asütsü.

**Tayonger :** Rev. L Kari Longchar  
Rev. C. Teyong Kichu.

## India nung Tenla ki aika rongdoktsütsü aliba Police-i nokdangtet

**New Delhi, February 16, 2023 (Agencies):** Central India nung Tenla ki aika rongdoktsütsü sentong aliba tatemesa Amongnü (February 12) police-i nokdangtetogo; amanger nisung asem apuba ajanga item sentong nokdangtetogo, ajisüaka parnoki Tenla ki kabo rongdoktsür liasü, ta police-i metetdaksü.

Madhya Pradesh kübok Chaukipura yimdam Evangelical Lutheran Arogo Tenla ki parnoki nungji pastor, Mahesh Kumre-i, February 12 nü anüngdang 11:00 ako nung parnok Tenla kidangi aruba mapang nung Tenla ki telungji rongdoker angu, ta metetdaksü.

Pastor-i ken o benokba sülen police-i Uttar Pradesh nungi arrshi küm 24, Avneesh Pandey apu.

N a r m a d a p u r a m Superintendent of Police, Gurkaran Singh-i, Pandey'er

medemer arrshi küm 24, Aakash Tiwari-i amaksü aliba Tenla kitem aliba tesem Pandey nem metetdaksür liasü, ta ashi. "Onoki item nisung mapu asü nungbo parnoki Itarsi [sub-district headquarters of Narmadapuram District] aser Bhopal na nung Tenla ki aika rongdoktsür lila," ta paisa metetdaksü.

January 9 nü Pandey-isa Itarsi nung aliba Evangelical Church of India Tenla kima Laishiba aika rongdoktsüogo, ta police-i metetdaksü.

February 14 nü Itarsi nung pastor 30 shi senden mena sorkar ketdangsertem dang Arogo kiojentem aser Khristantem kümzüksü atema mepishitsü lemtetba sülen pastors fellowship aser Christian Youth Association of Itarsi nungi züngsemtemi February 15 nü sub-divisional magistrate ajurua pa ajanga India Tir nem agütsütsü atema temepishiba shidi ka agütsüogo.

**AO OSHI ANGAZÜKDAK:  
TANÜ ANGAZÜKTSÜBA OJANG**



**Otsü**

- (n) ojala mesüra obala tetsü (grandmother)
- \* Otsü semchirtem kanga meimer.

**Otsünu**

- (n) otsü tatsütsü (short story)
- \* Kaketreju nung tila tanurtemi otsünu kaket aziünger.

**OLONG PAITEP # 6432**

1			2						3
4							5		
		6					7		
									8
		9				10			
11									
12						13			
			14						

**TIPIEN**

- 1. Tajizüksü / Tatishitsü - (8)
- 4. Süng rongtemer anüngba - (6)
- 5. Ratanga ao / Senshi - (4)
- 6. Asalendong / Sadangba - (4)
- 7. Tzüma nung senzüba - (3)
- 9. Netsü tedi - (3)
- 10. Yimsüsüba menden kümsük - (6)
- 12. A \_ \_ \_ \_ a - (4)
- 13. Jamir tebur dang ajaba - (6)
- 14. Alima yanglusang - (8)

**LANGTSÜNGLEN**

- 1. Temin sülen aliba shilem - (6)
- 2. Asaya balala - (9)
- 3. Mechinü-i aküm - (4)
- 5. Angu tashi - (9)
- 8. Arem shiruru tulu ka - (6)
- 11. Ajunga - (4)

**OLONG PAITEP # 6431 TELANGZÜBA**


**TIPIEN:**

- 2. Bangsemo, 6. Tiptem, 8. Jen, 9. Talila, 11. Aren, 12. Tzübo, 14. Alia, 16. Angati, 17. Odi, 18. Azü, 19. Sünglang.

**LANGTSÜNGLEN:**


- 1. Yipten, 3. Nüja, 4. Sangro, 5. Milen, 7. Tulu, 10. Laza, 11. Aben, 12. Tiyong, 13. Ajizük, 14. Aitsü, 15. Tasa, 16. Aina.

**NAI-A YA METETTER MA**



Taoba mapang Nazi Party nung züngsem Adolf Dassler-i Adidas company ya mezüng tenzük. 'Adi' ji pa nick name aser 'das'-ji pa tanabuba tenüng ojang mezüngbuba asemji lir.

**Noksa nung meputepi aliba 10 bushiang**



Assam nung cardiologist mongin Dr Hem Chandra Kalita nem "Award for Excellence in Medicine - 2023" award agütsüba angur. Iba sempet ya Guwahati nung amenoka aliba Down Town Hospital ajanga agütsür aser parnoki Dr Hem nem kulikaket, gold medal, memento aser Rs 1 lakh cheque ka agütsü. Dr Hem Chandra Kalita ya Assam Medical College Hospital (AMCH), Dibrugarh nung Department of Cardiology nung professor & HOD lir.

**PAJSC-i Feb 21 tashi Itanagar mokdangtsü: Sorkari internet shibangogo**

**Itanagar, February 17, 2023**

**(Agencies):** Arunachal Pradesh nung APPSC paper temai adokba ken o atema February 21 tashi lungkak aittsü ta metetdaksüogo.

"Iba sentong ya Pan Arunachal Joint Steering Committee ajanga dang masü saka public aser temeimertemi külemi ayongzüker" ta lungkak aiter kati ashi.

Onoki akhangba ama telangzüba mangu tashi February 21, 2023 tashi lungkak aittsü ta paisa ashi.

Tanü Itanagar nung lungkak aitba sentong nung sepaitemi lung agi aondang APPSC tatidang agütsürtem aser parnok tsüraburtem aika yiru.

Shantanu Dayal-i APPSC chairman inyaksü shimba anema Itanagar nung tanü lungkak ait aser idangji

sepaitemi süng agi züka senshidaktsütsü merang aser lungkak aiterterem dak lung agi aon.

Pan Arunachal Joint Steering Committee (PAJSC)-i lungkak aitba sentong ayongba mapang law & order khuret majurutsü atema Itanagar Capital Region nung BSNL aser tanga private internet service providers ajak shibangogo.

February 17, 2023 nikongdang 6:00 ako nungi February 19, 2023 nikongdang 5:00 ako tashi Itanagar nung internet services shibangtsü ta Arunachal Pradesh sorkari metetdaksü.

Külen, lungkak aiterterem highway nung maneni lungkak aiter aser parnoki akhangba ama telangzüba mangu tashi lungkak aittsü ta tekong

meranger.

Chief Minister-i inyakyim kar agizükba sülen ang senden amentsü ta lungkak aiterteremisa ashi.

Police-i pua alir ajak chioktsü aser parnok anema sections kecha mamshitsüla. Maneni, yirua alirtem aser parnok tsüraburtem nem temenok agütsütsü ta lungkak aiterteremisa akhanger.

Sorkari ayongba senden nung APPSC tatidang agütsünürtem, CBOs aser kaketshir telok shinga madentsü ta lungkak aiterteremisa akhanger.

Pan Arunachal Joint Power Steering Committee-i lemtetba nung tatidang agütsürtem aser tsürabur ajaki mulunga agizükba sülen ang Chief Minister den senden amentsü ta parnokisa ashi.

**Meghalaya CM Conrad-i state atema kecha meinyak: Amit Shah**

**Shillong, February 17, 2023**

**(Agencies):** Meghalaya Chief Minister Conrad Sangma-i state atema kecha meinyak anungji taruba Assembly election nung BJP nem vote enokjang ta Union Home Minister Amit Shah-i ashi.

Meghalaya kübok Rangsakona nung election nüboyimba sentong ka nung Amit Shah-i iba ya

metetdaksü.

"Meghalaya CM-i state atema kecha meinyak. BJP nem maongka ka agüjang aser BJP-i state nung ki shia nung tap water agütsütsü" ta pai ashi.

BJP sorkar alidak ajak nung onoki terenlok mapa inyaker. Meghalaya nung sorkar kümra state renloktsü, ta Amit Shah-isa shisem.

Assam sorkari terenlok

mapa inyakba atema tenüngsang agütsür. Nenoki Assam repranger idakji terenlok inyakba nungi angazükang, ta paisa metetdaksü.

"Meghalaya nung BJP sentong nung nisung yamai adenshiba mengudang liasü. Meghalaya nung BJP-i takok angutsü aser onoki Meghalaya atema temulung agütsütsü" ta Amit Shah-isa ashi.

**Manipur nung NRFM-i mozü shibelener 2 khaset**

**Imphal, February 17, 2023**

**(Agencies):** Manipur kübok tesem balala nung mozü shibelener ana khasetba atema National Revolutionary Front, Manipur (NRFM)-i tenüng agiogo.

Kayenpaibam Nganga (26) ji mozü shibelenerba maparen nung shilem agiba atema tepset ta NRFM information and publicity secretary Sanajaoba Meitei-i ashi.

Nganga indang tasü mang ya February 14, 2023 nü Imphal east district kübok Heingang ayongküm nung angu. Pa ya

injang agi khasetba liasü.

Ano, Hoikhling (26) ta ser tetsür kati mozü shibelenerba atema khaset ta NRFM-isa metetdaksü.

October 17, 2022 nü la ya Churachandpur district kübok Pholjang yimtsüing nung lar ki anasa khaset.

Manipur nung mozü shibelenerterem aser ayokertem tarutsü anogo nung temerenshi tulu angutsü ta NRFM-isa metetdaksüogo.

Külen, tesüiba ghonda 24 tsüingda police-i tesem balala nung NRFM züngsem 3 puogo.

Parnok ket nung pistol ka den magazine ka, 7.65 ammunition 5, mobile handsets 3, Aadhaar card ka, PAN card ka aser Honda Activa ka ngutetogo, ta police-i metetdaksü.

NRFM züngsem Thounaojam Hembra Singh (19) ya City Convention anasa apu. Iba tesem ya G20 sentong agidak tongti ka lir.

Pa dang asüngdangya asüba sülen Sagolsem Rahul Meitei (19) aser Khulem Shyam Singh (19) na tesem balala nung apu.

# US Tir Joe Biden temang nung timtem mali: Doctor



**Washington, Tsüklai/February 17 (Agencies):** Arishi küm 80 tain Joe Biden temang anema lir aser mapa inyaksü junga lir, ta White House doctor-i US tir temang tendangba sülen ashi.

"Tir temang anema lir aser mapa inyaksü junga lir aser tarendak makai pa mapa ajak shidak inyaker," ta White House physician Kevin O'Connor-i Brehostibarnü Tir Biden temang reprangba sülen ashi.

Biden ya 2024 küm tir kümsük tanabuba inyaksü asoshi renemshia alidang pa temang tendangba ya ajaki züngzünga repranga liasü. Biden dak COVID symptom kecha mali aser 2021 küm November ita tendangba sülen pa tetsüing atsüa jajaba tamajungba makum, ta ashi.

Biden-ia pa temang anema lir ta ashi. "Ajak junga lir... Tsüingrem dang pelar," ta pai ashi.

Washington tezülen Bethesda, Maryland nung aliba Walter Reed National Military Medical Center nung doctor

temi Biden temang ghonda asem repranga liasü, aser 2021 küm January ita US tir akumba sülen temang ajunga tendangba ibai tanaben buba alitsü.

Biden indang cholesterol level ajema yutsütsü mechi statin Crestor agir, koba seasonal allergies aser acid reflux asoshi lir. Ajidang masü iba mozü ya temolungiang yimya balala nung arakzüba atema anti-coagulant ka lir.

Pa indang tejak aser tekolak nungi takep tila kar ainba indoktsü asoshi liquid nitrogen amshia liasü aser tir indang teko nungi tarak ka indoka biopsy yok," ta O'Connor-i ashi.

2021 küm Biden temang tuozük seret 83.5 liasü aser tang seret 81 kumogo. Pa indang body mass index ya 24.1 lir aser 2021 nung 25.0 liasü aser pa indang blood pressure ya 126/78 lir koba 2021 nung 120/70 liasü.

Biden teperem marakzütetba ya spinal arthritis ajanga lir, ta pai ashi.

"Tir jajaba yimya nung atsüdaka ayur, saka taoba küm

dang tamajungba masü," ta ashi. Biden ya US tir inyaker rongnung tambotising lir, aser pa tain akumba asoshi asüngdangba melangzü, saka 2024 nung pai takok ngutetra ano küm asem tenzüksü aikati khuret süa bilemetsür.

Democrats tesadang ka dak tali aser Republican tem timba densema America nung quarter asem shi-i Biden ya sorkar mapa inyaksü kanga tain ta ashir, ta Reuters/Ipsos poll ka February 6 nungi 13 tsüingta agiba nung sayur.

Democrats timbai tir ya tekolak shidak lir ta ashir saka ano tesadang kati pa tir inyaksü asoshi temang agi menanzüksü, ta ashir.

Biden-i yi majemer mesüra moko Machir aser hopta nung ponguben temang atsüshia exercise agir.

# PELABA LEMSATEPER



21.09.1935-2.02.2023

"...Kibubai agütsü aser Kibubai bener ao; Kibuba tenüng moajang." Yob 1:21

Onoki teti meima aliba obala **Asür Imtinuchet (Ex GB and Chairman Khar)** mapang talangka shiranga arur February 2, 2023 nü Dimapur nung asüba mapang onok den yariteper ajak dang tepang agi rasaa meshitba tepela lemsateper.

Tembar, kidanger, kinunger, telok balala, arogo aser lokti tentet temi sarasademtsüba, rongsen aser nübu agi yariba aser Khar yimtsüing tashi pa mang meina arur ajak dang kangasa pelar. Asen Tulusang Tsüingremi nenok ajak mulamoshia moajang ta onoki sarasademtsür.

*Temeim chirnur, anük-apang, semchir aser kinungertem*



## Ao Baptist Arogo Mungdang (ABAM)

IMPUR-798 615, MOKOKCHUNG, NAGALAND: INDIA

E-mail: abamimpur7@yahoo.co.in

Website: www.abamimpur.org

February 17, 2023

### Clean Election Prayer Rally, February 19, 2023

Tanü asen tendak meimlaba tatalokbatem angudang süngmanger aser aoksar. Khristan tiemba aliba State ka nung iba tashi ataloktsüsa litetba ya koda asü ta ajaki shisadanger. Alimai süngmangtsüsa tamajung inyakbatem ya Tsüingrem dak amangertemi inyaker. Iba ama mapang ka nung tamangertemi tasü ita ola adoktsü aser kukoa sarasademtsü mapang tongja tongogo. ABAM Clean Election Committee aser NBCC ajanga Naga lima nung aliba arogojem ajak nung February 19, 2023, ya aruya aliba Election merüka aser süngjema agitetsü asoshi aser India lima tesem balala nung tamangertem reshikangshiba atema khuret bena sarasademtsü ayonga lir. Sarasadem onüktem arogojem dangi belenshiogo. Lim arogojem nung pei dak apet sentong yanglua agitsü osang yokogo. Tamanger tem külemi sentepa tamang agi sarasademba nung tashi lir. Tsüingremi asen tamang sarasadem aser nüktzü akanger ta angateta ajaki iba sentong nung shilem agitsü mepishir. "Aser asenoki kechisa meshidir, aji pai angar ta asenoki metetra, ajangla pa dang kechisa meshi item nguogo ta asenoki metet" (1 Yohan 5:15). Maneni sarasademang (1 Tesalonika 5:17).

**Rev. Dr. Mar Pongener**  
Executive Secretary, ABAM.

### NO VOTER TO BE LEFT BEHIND

Special entry passes into the polling station will be given to the following to cast votes without waiting in queue



**a. The identified Person with Disability Voters.**

**b. Even those unidentified PwD voter, if produce Disability ID cards to the Presiding officer, can be facilitated (such cases can be reported to the ERO for recording later)**

**Octogenarian and Older voters**



**Pregnant Women Voters (if identified by Anganwadi Workers, etc)**

**Women Voters with Babies in Arms.**



OFFICE OF CEO, NAGALAND

ceo.nagaland.gov.in | ceo\_nagaland@eci.gov.in | @ceonagaland

### OFFICE OF THE CHIEF ELECTORAL OFFICER NAGALAND: KOHIMA

### NO VOTER TO BE LEFT BEHIND

To fulfil the commitments of 'No Voter to be left behind' and ensuring 'Accessible Elections' in this General Election the following amenities are being provided in the polling stations so that the rigours of polling processes get reduced and making it a pleasant experience on the day of poll for all categories of voters.

- Efforts being made to provide minimum facilities for the voters in the polling stations like:
  - Drinking water
  - Electricity
  - Ramp for PwD Voters
  - Toilet
  - Waiting shed
- Giving special entry passes into the polling station for certain special categories as depicted in the adjoining poster.
- Under Rule 49N of the Conduct of Elections Rules 1960, the visually impaired can have one companion to the polling booth to record vote in the machine as per choice.
- The balloting unit of EVM, on the right side of press button, contains Braille numerals (SI Nos) for visually impaired voters to select their choice of candidate/ NOTA to cast vote.
- The electoral law not only guarantees equality of PwDs but also mandates the election machineries to facilitate their access and participation in the electoral processes within the polling station, among others, like provision of ramps for wheelchair-user voters and parking facilities for the vehicles of the PwD voters at the premises.
- The Election Department has also asked political parties to include in their political campaign manifesto and plan for protection and safeguarding the rights of PwDs and Senior citizens and providing ample opportunity for participating freely. The District Election Officers have been instructed to facilitate the special needs of the PwDs and Senior citizen voters.

This is issued for all stakeholders to comply and the PwDs and Senior citizen voters to come out and participate in this election and make our democracy wholesome and reflective of people's choices and aspirations.

## Nagaland nung modern wrestling aintsü mapang agitsü: Khokhwe Kikhwesiil



Madhya Pradesh nung Khelo India Youth Games 2022 nung melangtepba asaya nung Nagaland nungi shilem agirtem den Nagaland Wrestling coach Khokhwe Kikhwesiil noksa nung angur.

**Dimapur, Tsüklai/February 17 (TY):** Tawa Madhya Pradesh nung Khelo India Youth Games 2022 mapang melangtepba asaya nung Nagaland nungi nisung pezü agi akumba telok tila kati shilem agia liasü, kong tetsür melangteper ana densema liasü. Parnok nükjidongji state nung melangtepba asaya mesamadaktsütsü asoshi liasü.

Tanü asüng melangtepba yimya ya asenok Naga nung akhi yimya nung melangtepba koba dang Kene ta ajar, iba den kanga agi balaka lir. "Asen Naga nung melangtepba yimya ya India lima North Eastern state tem rongnung tejentiba asaya ka asutsü," ta Nagaland Wrestling coach Khokhwe Kikhwesiil-i ashi.

"Region nung lanurtemi tanü-asüng melangtepba yimya angazuktsü janra arur, saka national jenjang tonga aotsübo ano mapang lir," ta pai ashi. Paisa, Naga lima nung tanü asüng yimya nung melangtepba ya aintsü mapang agitsü, ta shisem.

Khokhwe ya akhi mapang

melangteper ka liasü saka pai national jenjang tonga metokteptet. Ajsüiaka tarutsü nung lanurtemi pa dang nungi tajungba asayatetsü imlar. "Khelo India Youth Games ya Naga nung asoshi tangazükba aser tajungba küma inyaktetsü sapang tajung ka lir aser ibajagi künübo Naga nung melangteper temia national jenjang nung tajanzük tulu angutsü imlar," ta pai ashi.

Naga tsür Vizoseno K-i tetsürtem tuozük seret 57 mezüing asaya nung kanga junga West Bengal tsür Aishani Singharoi madak takok angu. Saka tanabuba round nung Madhya Pradesh tsür Hansaben den quarterfinal asayaba nung tamakok ajuru.

"Tanabuba asaya ya ni asoshi kanga tasak liasü aser points angutsü merangka Hansaben ya kü dang nungi kanga agi tajungba liasü aser ni tamakok angu" ta Vizoseno-i ashi.

Vuzoseno ya taoba mapang Khelo India Youth Games asaya ana tashi nung shilem agia aru saka takok marok khen danga mongutet. Vuzoseno tebu ya

linük nung melangteper ka liasü aser pai la ajungshia iba asaya nung shilem agidakja anitet.

Lai 2022 North East Olympic tetoktepba nung gold medal ngua lir. "La ya ano tanur ka dang aser ano tetoktepba balala nung asayaba ajanga tajungba akümtsü bilemer," ta Nagaland team Coach ajanga ashi.

Training mapang nung melangteptsü asoshi partner maliba ajanga tetsür melangteper tem terelok malir, ta Coach-isa ashi.

Parnok lokti training ya Indira Gandhi Sports Complex, Kohima nung agir. "Tetsür melangteper tem telok tajung ka lir saka parnok tuozük ishiba nung lir aser seret 57 telok nung parnok ana-asem shi lir," ta Khokhwe-i ashi.

Vizoseno-i Bhopal nung T.T. Nagar stadium nung junga masayatetba atema temulung ajema mebilemer saka taruba asayamung nung ano tajungba asayatsü tebilemba lir ta metetdaksü. "Tarutsü nung asaya yimya tajungtiba melenshia toktepsüji kü nükjidong," ta Vizoseno-i shisem.



Taoba mapang India nung cricket asayar Sunil Gavaskar-i New Delhi nung aliba Arun Jaitley Stadium nung Cheteshwar Pujara nem 100th test cricket match asayatsü lia 100th test cap agütsüba noksa nung angur.

## Border-Gavaskar Trophy: India teimla tulu nung lir

**Delhi, Tsüklai/February 17 (Agencies):** Australia nung Usman Khawaja aser Peter Handscomb nati half-century yanglutetba ajanga Delhi nung India den Border-Gavaskar Trophy test match tanabuba asaya mezüing anogo teimla ka nung tembang.

Mezüing batting shimba sülen Australia nung ya runs 263 yangluteter lia ajak out süma, kong opener Khawaja-i runs 81 aser Handscomb-i runs 72 (not out) yangluteta liasü aser India nung Mohammed Shami-i nisung pezü out sütsü aser runs 60 agüja liasü.

Anogo tembangba mapang India ya 21-0 liasü, anungji runs 242 agi tajemba, kong captain Rohit Sharma runs 13 aser KL Rahul runs pezü yangluteta lir.

Pezüben asayatsü aliba Test series mezüingbuba Nagpur nung India-i ayong-ayonga kokteta 1-0 nung lir.

Khawaja-i runs 50 yangluteter lia pa den külemi tenzüksang David Warner (15) ya Ravichandran Ashwin-i out

sütsü aser iba sülen runs 18 yangluteter lia Marnus Labuschagne wicket agi aser Steve Smith- runs kata monguteti ball asem nung out süa Australia 91-3 akum. Iba asaya nung Ashwin-i wicket asem agi aser runs 57 agütsü.

Middle order nung aitsang Travis Head-i runs 12 nguteter lia out sütsü.

Wicketkeeper Alex Carey ya ball tenet nung run kata meyangluteti out asü.

Captain Pat Cummins-i runs 33 yangluteter lia over 68 buba nung Ravindra Jadeja-i out sütsü, shibai Australia nung wicket asem agi aser runs 68 agüja liasü. Pai Todd Murphy indang wicket agia liasü.

Iba sülen Shami-i Nathan Lyon aser left-arm spinner Matthew Kuhnemann wicket agia Australia nung over 78.4 buba nung ajak out asü.

Mezüing anogo Australia nung ajunga out sümaba sülen India nung batting tenzüka runs 21-0 yangluteter asaya anena lir.

## India nung Jeje Lalpekhlu football asaya nungi anener



**New Delhi, Tsüklai/February 17 (Agencies):** India nung football asayar Jeje Lalpekhlu-i football asaya nungi anisüngzüktsü telemtetba Hokulbarnü agia liasü.

Arishi küm 32 tain striker-i iba osang ya Twitter nung sangdong aser pa national team tashinung asayatetsüsa pa den yariteper ajak dang pelaba lemsatepa liasü.

2016 küm Jeje ya AIFF Footballer of the Year shima liasü aser SAFF takok marok asemben nguteta liasü. Pai ISL takok marok anaben ajungket aser Federation Cup ka, Intercontinental Cup ka, Tri-Nation series ka aser I-League title ka nguteta lir.

"Tanü ya ni atema temulung kanga shirangba anogo ka lir. Asayaba wadang nem tatem salem ashitsü ni telemtetba agi," ta pai ashi.

International sapang nung linük indang jersey semer asayatsü maongka ngutetba ya pa asoshi tejak tentetba mapang ka liasü, ta pai ashi. Pai linük

tenüing nung asaya 56 nung shilem agia lir aser iba mapang goal 23 agütsü.

"Kü linük asoshi asayatetba atema ni tejak tenteter aser nür linük tenüing nung shilem agiba dang nungi tajungba kecha mali," ta Jeje-i ashi.

Jeje ya Mizoram state nungi lir aser Mohun Bagan, East Bengal aser ISL franchise Chennaiyin FC nungi asayaogo.

"Linük tesem ajungalen club balalai kü nem maongka agütsüba asoshi ni kanga pelar," ta pai ashi.

Pai mezüing youth level nung Pune Football Club nungi asaya liasü aser iba sülen senior division nung asaya.

"Iba tebour tajung wadang yanglutetba asoshi ajak dang pelar. Coaches, clubs, teammates, opponents, tembartem, fans, mentors aser ozü kinungertem dang kanga pelar. Nenok medeni takoktsü kecha meliasü," ta Jeje-i ashi.

Jeje-i football nungi anisüngzükba sülen kechi inyaktü, ajibo shia mali.

## BILEMDANGANG

"Tajungtiba akumtsü atema nai tamajungtiba azüoktettsüla."